

012 水牛恰白鴿鷺 // 甘露 (04/07thk改寫)

有一隻白鴿鷺，對(ùì)足遠足遠的所在飛來到咱台灣。這逝(tsuā)路伊飛過闊莽莽的海洋、飛過青菱菱的島嶼，佇刺疫(tshiah-iah)的日頭跔，伊看著白色的湧崙仔，一崙一崙(lun)拍佇百外尺的石頭邊，海湧的聲伴伊飛過若(ná)像欲去太平洋冒險的龜山島。就按呢，伊毋甘歇(hioh)睏，一直飛、一直飛。

「就欲到位--矣！就欲到位--矣！規半冬無看--見的老朋友，毋知tsit-má好--無？」白鴿鷺那飛心內那咧想：「哇！今年遮(tsia)的水比往(íng)年較濟，嘛比頂年較清氣，我轉--來矣！我轉--來矣！」

白鴿鷺又閣轉來到伊懷念的故鄉。

「Hmh，頭前有一窟水，緊飛來共身軀洗洗咧。」白鴿鷺是真愛清氣的鳥仔，便若有閒(îng)，伊攏佇水邊洗身軀。

「這幾冬遮的自然環境那來那好--矣，涼涼的風--裡有芳芳的草仔味，靜靜的水--裡有爍(sih)咧爍咧的魚鱗(lân)光，按呢才是生炭的好所在啦。」白鴿鷺那洗身軀那掠魚仔食，閣那呵啫(o-ló)這個所在。

「有夠好食--的啦！有夠好食--的啦！這逝路路頭真遠，飛來遮，講實在--的，是有較忝頭--淡薄仔，毋閣誠價值。Hmh，頭前有一隻豆仔魚，算好運，我都食飽--矣，毋閣，heh~heh~，共你創治--一下。」

豆仔魚看著白鴿鷺，頭幹(uat)咧，衝衝磅磅(tshóng-x-pōng-x)那泅水那跳水，想袂到無拄好，煞跳入去佇水池仔咧浸水的水牛鼻孔內底。

盹龜(tuh-ku)的水牛予豆仔魚拍精神：「哈啾！哈啾！當咧好睏，是佗一籬(khoo)青仔穢烏白擗(lòng)、烏白泅，來佇我鼻孔內砣砣鑽(khók-x-tsng)？」

白鴿鷺：「水牛兄，水牛兄，真久無看--見矣，你最近kám好？是我恰豆仔魚咧耍，失禮啦，共你吵--著。」

水牛：「是白鴿鷺噢！你tang時轉--來的？足想--你呢。這暫仔好是好啦，毋閣無你來鬥清身軀，規身軀足癢(tshiünn)--的咧。」

水牛話都講猶未煞，白鴿鷺隨飛上去水牛尻脊骹(kha-tsiah-phiann)頂仔，替水牛清身軀。

水牛：「Bok! Bok! 規身軀誠輕鬆，白鴿鷺，猶是你上知影我佗位仔癢，老朋友就是老朋友啦。」

「到今你才知！水牛仔兄，你有較好--矣hōnn？我來去走--矣。」

水牛：「小等--咧啦！我有話欲共你講。」

「天欲暗矣，我欲緊來去看我的岫(siū)猶有佇--咧無，有啥乜(mih)話明仔載才閣講--啦。」白鴿鷺又閣袂等咧水牛話講煞，phiú--一下，隨飛kah無看見影。

「伊的個性一層仔都無變。噯！最近有一个歹心的人，用二、三十尺的網仔咧張(tng)鳥仔，白鴿鷺毋知會去拄(tú)著危險--袂」(約750字)